



古今法書苑

六十一
六十二

412
49
33









古今法書苑卷之六十一

吳郡王世貞元美甫編 雲間王乾昌伯元甫校

十三之石七

漢諸袁碑

大扶城之東北悉為諸袁舊基碑字傾低半虎碎折

惟司徒滄蜀郡太守騰博陵令光碑字所存惟此自

餘殆不可尋 水經注

漢鄭陂頌

鄭渾為沛郡太守于蕭相二縣與陂堰民賴其利刻

石頌之號曰鄭陂 水經注



漢司馬文預碑

明渠逕長樂宮渠北有樓漢京兆尹司馬文預碑水經注

漢孝子王立碑

盧奴鄉後隸安喜城郭南有漢朝時孝子王立碑水經注

漢梁巖碑

成國梁左有漢安定梁巖家碑碣尚存水經注

漢張敏碑

湍水逕冠軍縣故城水西有漢太尉長史邑人張敏

碑水經注

漢青州刺史孫嵩碑

汶水逕漢青州刺史孫嵩墓西有碑碣又逕丘城城

對牟山之西南有孫賓碩兄弟墓碑誌並在也水經注

漢有道兒君碑

魯高門一里餘道西有漢有道兒君碑是魯相陳君立水經注

漢修縣長魯國孔明碑

清河又東北逕邸閣城東城臨側清河晉修縣城

內有漢縣長魯國孔明碑 水經注

漢繹幕令匡碑

獲水自蒙東山水南有漢故繹幕令匡碑匡字公輔
魯府君之少子也碑字碎落不可尋識竟不知所立
歲月也 水經注

漢張明府祠碑

平輿縣城南里餘有神廟世謂之張明府祠水旱之
不節則禱之廟前有圭碑文字紊碎不可復尋碑側
有小石由按桂陽先賢畫贊臨武張熹字季智爲平
輿令時天下大旱熹躬禱弗獲嘉應乃積柴自焚主

簿崇小史張化從熹焚焉火既燎天靈感應即澍雨
此熹自焚處也 水經注

漢弘農太守張伯雅碑

綏水出方山逕伯雅冢塋四周壘石爲垣隅阿相降
列于綏水之陰門表二石闕夾對石獸于闕下冢前
有石廟列植三碑碑云德字伯雅河內密人也碑側
樹兩石人有數十柱 水經注

漢樂安任照先碑

陵縣城東門外有樂安任照先碑濟南治也漢文帝
置爲主國景帝爲郡王莽更名樂安 水經注

漢上谷長史侯相碑

碑云侯氏出自蒼頡之後踰股歷周各以氏分或著楚魏或顯齊秦晉卿士為斯其裔也食于華陽今蒲圻北亭也水經注

漢蔡昭碑

蔡岡北岡上有平陽侯相蔡昭冢昭字叔明冢有石闕闕前有二碑碑字淪碎不可復識羊虎傾低殆存而已水經注

漢郭奉先碑

陽翟縣城西有郭奉先碑側水有九山祠碑水經注

漢法子丹碑

上西門望先寺中有碑碑側法子丹碑作龍矩勢于今作則佳方古猶劣水經注

漢高陽令楊君碑

右漢高陽令楊著碑首尾不完而文字尚可識云司隸從事定穎侯相最後為善侯相善上一字磨滅不可見蓋其中間嘗為高陽令而碑首不書最後官者不詳其義也按楊震碑高陽令著震孫也今碑在震墓側集古錄

漢高陽令楊君碑陰

右漢高陽令楊君碑陰歐陽公古集錄云予家集錄
得楊震墓域中漢碑四震及沛相繁陽高陽令碑并
得碑陰題名然得時參錯不知爲何碑之陰也集古
所有餘盡得之又各以碑陰附于碑後其曰懷陵圉
令蔣禧字武仲者沛相碑陰也其曰故吏故民故功
曹史故門下佐者繁陽令碑陰也其曰右後公門生
右沛君門生者高陽令碑陰也

金石錄

漢楊公碑陰題名一

右漢楊公碑陰題名楊氏世家閩鄉墓側皆有碑今
其存者四予家集錄皆得之乃太尉沛相高陽繁陽

令也此不知爲何人碑文字殘缺僅存者十五人又
減其一其十四人懷陵圉令相蔣禧字武仲宜祿長
蕭劉瑞字仲祐孝廉杼秋劉旭字子明太官日丞譙
曹臻字建國辭曹史鄆公孫銀字山根門下書佐史
韓純字子敬豐畢珮字廣世鄆孟縱字河雒決曹書
佐鄆公孫賜字元賜皆稱故吏又有故吏贊陳俊字
仲顯蘄夏陽字儀公蘄兒銀字伯王杼秋劉順字子
選沛周儀字帛民凡五人皆不著職而孟縱字河雒
周儀字帛民文字皆完非訛謬而莫曉其義也

集古錄

漢楊君碑陰題名二

右漢楊君碑陰題名凡一百三十一人有稱故吏者故民者處士者故印曹史者故門下佐者類列不一似當時人各隨意書之而文字磨滅僅可讀其姓名字俱完可識者八十三人其餘或在或亡蓋後漢楊震墓域中碑也楊氏墓在閔鄉有碑數片集錄得其四并得碑陰題名然參錯不知爲何碑之陰也其名氏可見者其人亦不足考第以漢隸直蹟故錄之爾

集古錄

漢浚儀令衡立碑

右漢浚儀令衡立碑云公諱立字元節其先出自伊

尹而其銘曰干穆從事歐陽公集古錄號爲元節碑且云疑其姓伊而爲從事也今碑首尚完題浚儀令衡君之碑蓋漢時石刻其官爵姓氏旣載于額則其下不復更著而文已殘缺又不見其額則遂難考究矣立與衡尉卿衡方墓皆在今鄆州中都方碑亦云真先伊尹號稱阿衡因以氏焉

金石錄

漢光祿勳劉曜碑

右漢劉曜碑今在鄆州界中文字磨滅僅有存者云諱曜字季尼年七十三其餘壽里官閔卒葬歲月皆不可見字爲漢隸亦不甚工惟其銘云天臨大漢錫

以明愬碑首題云漢故光祿勳東平無鹽劉府君之碑以此知為漢碑也

集古錄

右漢光祿勳劉曜碑集古錄云君諱曜字季尼年七十三其餘爵里官閥卒葬歲月皆不可見今此碑雖殘缺然尚有可考處蓋孝文之裔又嘗為太官令郎中居延都尉太宗正衛尉遂為光祿勳至於卒喪年月則斷續不可考矣

金石錄

劉曜字季尼此碑可識者餘不完難讀碑道書曰漢光祿勳東平無鹽劉府君余按劉氏本范氏後自秦而反故其處者為劉氏則劉當為留說文留从丩戶

開為卯卯為春天門戶闔為酉酉為秋天門則留自從丩丩為酉之省文故知留不從卯劉姓則不從刀也當漢之世緯書既出故言丩金刀者劉也學者不復考古妄意求之昔許慎以劉為留其轉而為劉者以田易為刀也然姓書周之大夫有食采於劉者因地以為氏則與漢姓異世但不知古文劉者其畫與漢如何故凡漢姓自當為留或以為留南朝有留異或以為出留侯非也特漢姓不失其本者姓此讀跋漢張侯殘碑

右漢張侯殘碑張侯者子房也碑已斷裂摩滅不可

次序獨其額尚完題漢故張侯之碑在今彭城古留
城子房廟中驗其字畫蓋東漢時所立樂史寰宇記
陳留縣有張良墓引城冢記云張良封陳留侯食邑
小黃一萬戶漢爲良築城因名張良城今陳留有子
房廟貌甚盛予按西漢書地理志注留屬陳故稱陳
留宋亦有留彭城留是也子房傳曰始臣起下邳與
上會留臣願封留足矣沛與彭城相近而此碑漢人
之所立乃在彭城然則子房所封非陳留明矣城冢
記誕妄蓋不足信也

金石錄

漢荊州從事苑鎮碑

右漢苑鎮碑其畧云漢故荊州從事苑君諱鎮字仲
弓南陽人也其先出自苑栢何爲晉樂正世掌朝廟
之制又云有苑子園寔能掌陰陽之理君即其畧也
按姓氏書皆云苑氏出于左傳所載齊大夫苑何忌
之後今此碑所謂苑栢何與子園左傳國語皆無其
人故錄之以待知者

金石錄

漢趙相雍府君碑

右漢趙相雍府君碑其後歷敘官世官爵而所述雍
君事甚畧云趙國相名勸孝廉成皋令趙國相又云
在官五載蒞政清平有甘棠之化年四十五卒于官

故吏民漢中太守邯鄲某等其名慕戀恩德刻石稱
頌焉又有闕銘題漢故趙國相雍府君之闕云金石錄
漢逢府君墓石柱篆文

右漢逢府君墓石柱篆文云漢故博士趙傳逢府君
神道唐李利涉編古命氏北海逢氏有名絲字子繡
者為趙漢王傳其孫萌不仕王莽蓋前漢時人疑其
是也而濰州圖經北海縣有逢汾墓云汾好學以德
義聞徵為博士趙王傳卒門人執衰經者數百葬于
寒亭南四里今此篆文既不載其名皆莫可考然圖
經所載逢君事首尾甚詳必別有所據又疑絲與汾

兩人前後皆嘗為趙王傳故并載之金石錄
漢田君碑

右漢出君碑今在沂州其名氏皆已磨滅惟云其先
出自帝舜之苗裔自完適齊因以為氏乃知為姓田
爾又云周秦之際家于東平陽君總伯修韓詩京氏
易究洞神變窮奧極微為五官掾功曹州從事辟太
尉廷熹二年辛亥詔書泰山琅邪盜賊未息州郡吏
有仁惠公清撥煩整化者試守滿歲為真州言名時
牧劉君知君宿操表上試守費自此以後殘缺不可
次第而隱隱可見蓋無年壽卒葬月日而有故吏薛

咸等立石勒銘之語乃□縣令長德政去思碑集古錄

漢仙人唐君碑一名公昉碑

漢北智水川有唐公祠唐君字公房城固人也學道得仙升仙之日婚他行未還不獲同偕雲路約以此川為居言無繁霜蛟虎之患因號為婚鄉水亦即名焉百姓為之立廟刊石立碑表述靈異水經注

右漢公昉碑者迺漢中太守南陽郭芝為公昉修廟記也漢碑今在者類多磨滅而此碑文字塵有可讀所謂公昉者初不載其姓名但云公字公昉爾又云耆老相傳以為王莽居攝二年君為郡吏啖瓜旁有

真人居一有左右莫察君獨進美瓜又從而敬禮之真

人者遂與期谷口山上乃與君神藥曰服藥以後當

移意萬里知鳥獸言語是時府君去家七百餘里休

謁往來轉景即至闔郡驚焉白之府君徙為御史一作

吏鼠齧被具君乃畫地為獄召鼠誅之視其腹中果

有被具府君欲從學道頃無所進府君怒勅委部吏

公昉妻子公昉呼其師告以厄其師以藥飲公昉

妻子曰可去矣妻子戀家不忍去於是乃以藥塗屋

柱飲牛馬六畜須臾有大風雲來迎公昉妻子屋宅

六畜倏然與之俱去其說如此可以為恠妄矣彼漢

人乃刻之金石以傳後世其意惟恐後世之不信然
後世之人未必不從而惑也

集古錄

此碑巴郡太守郭芝立石祠下書其事者昔公昉以
樂塗屋柱飲牛馬六畜儻然俱逝然雞犬皆仙淮南
王或爲其說予見淮南以罪誅死知其妄也昔葛稚
川謂劉向列仙傳自刪秦大夫倉書中出之又采其
遺者中黃仙人石光麋鳳子雀文劉元樂子長李文
尹子張子和王柱董君異衛叔卿梁柏而謂李八百
為唐公昉作傭客後八百偽病公昉為費數千萬不
以為損又作惡瘡公昉與其妻妾紙之其瘡盡愈以

丹經一卷授公昉入雲臺山合丹丹成仙去不聞其
與六畜俱逝然碑立于漢而洪為書在後洪不取此
知其謬也洪嘗論藥可飲牛馬鳥獸令其不死則如
公昉事亦不謂其傳可信耶

漢永樂少府賈君闕銘

右漢永樂少府賈君闕銘按漢書桓帝母孝崇熹皇
后居永樂宮和平元年詔置太僕少府如長樂故事
其後靈帝母孝仁董皇后亦居是宮歐陽公集古錄
引章懷太子注云漢官儀長樂少府以宦者為之則
賈君蓋亦宦者也余以漢史及石刻考之當時三公

如陳球劉寬皆常為此官蓋自西漢以來太皇皇后
官屬如大長秋之類皆參用士人以賈君為宦者亦
未必然也 金石錄

右漢人闕銘二其一曰永樂少府賈君闕其一曰雒
陽令王君闕二者皆不知為何人按漢書桓帝母孝
崇厚皇后居永樂宮和平元年詔置太僕少府如長
樂故事又按顏師古注地里志曰魚豢云漢太行忌
水故去洛水加佳師古謂光武以後始改為雒然則
二人者皆後漢時人也又按漢官儀長樂少府以宦
者為之則賈君者蓋亦宦者也 金石錄

漢酸棗令劉熊碑

右漢劉熊碑在今酸棗縣云君諱熊字孟下缺一字
按酈道元注水經酸棗城內有漢縣令劉孟陽碑今
據碑能實為此縣令然則所闕一字當從水經為陽
也碑又云君光武皇帝之玄孫廣陵王之孫俞鄉侯
之季子也按後漢書光武子廣陵思王荆以諱死顯
宗封其子也壽為廣陵侯又封元壽弟三人皆為鄉
侯而李利涉編古命氏唐書宰相世系表皆云荆生
俞鄉元侯平生彪襲封今據熊當為彪之弟然則
光武乃其曾孫而曰玄孫者疑碑誤 金石錄

右漢俞鄉侯季子碑云君諱熊字孟下缺一字廣陵海西人也厥祖天皇帝垂精接感篤生聖明子孫享之分源而流枝葉扶疎出王別胤受爵列土封侯載德君光武皇帝之玄孫廣陵王之孫俞鄉侯之季子也由是而後文字缺滅其稍稍可讀者時得其一二云六籍五典如源如泉既練□卷舒隨化流南城政猶北辰三祀有成來臻我邦仁恩如冬日威猛烈夏日吏民愛若慈父畏如神明其後又云採摭謠言作詩三章據碑文無卒葬年月而其辭若此似是德政碑按後漢書光武皇帝子曰廣陵思王荆荆子元

壽等四人皆封鄉侯史畧而不載其名俞鄉侯者不知為誰也思王荆之第幾子也天皇帝之語自漢以來有矣

集古錄

右漢酸棗令劉熊碑集古錄作俞鄉侯季子碑且謂碑云君諱熊字孟下缺一字復引後漢書光武子曰廣陵思王荆荆子元壽等四人皆封鄉侯而不載其名俞鄉侯者不知為誰金石錄引酈道元水經注云酸棗城內有漢縣令劉子暹陽碑則所缺一字當從水經為陽又引李利涉編古命氏及唐宰相世系表皆云荆生俞鄉元侯平生彪襲封則熊當為彪之弟

乃武曾孫而曰玄孫者碑之誤也隸釋謂歐陽公不知碑在酸棗無以名其官遂謂之俞鄉侯李子碑而引王建題此碑詩云不向圖經中舊見無人知是蔡邕碑而又疑其非中郎筆法予則以為建生于唐其云蔡邕碑者蓋本之圖經非鑿空而言洪氏不當于此疑之也

金雉琳琅

漢臨朐長仲君碑

右漢臨朐長仲君碑文字磨滅其粗可見者云君諱雄又云歷郡五官掾功曹史辟從事舉孝廉除郎中遷臨朐長而其額題故臨朐長仲君碑云

金石錄

漢蜀郡太守任君神道

右漢蜀郡太守任君神道九字字畫壯偉然不著名字鄉里歲月莫詳其爲何人也

金石錄

漢蜀郡屬國都尉王君神道

清水南道側有二石樓相去六七丈制作精妙題云蜀郡太守姓王字子雅南陽西鄂人有三女無男而家累千金父沒當葬女各出錢五百萬一女築墓二女建樓以表孝思名云墓樓先君生我姊妹無男兄弟茲當安神立宅翳靈后土冥冥絕後何以彰吾君之德云云

金石錄

右漢王君神道在南陽云漢故蜀郡屬國都尉王君神道封陌按酈道元水經注云云今此碑後有唐向城令張璿之撰孝女雙石樓記所書與水經注合惟水經誤以都尉爲太守耳璿之記天寶七載建別錄于後

金石錄

漢司空殘碑

右漢司空殘碑政和乙未歲得於洛陽天津橋之故基首尾已不完所存四十五字字畫奇偉其詞有云命爾司空余回爾輔據此乃嘗爲三公蓋當時顯人惜其不見名氏也碑陰有故吏題名百餘人尤完好

筆法不減蔡邕石經云

金石錄

漢益州太守楊宗墓闕名

右漢楊宗墓闕銘在蜀中有十六大字云漢故益州太守楊府君諱宗字德仲墓闕汶陽李長茂爲蜀使者罷歸以此本見遺長茂名公年東州善士以畫山水著稱者

金石錄

漢益州刺史薛君巴郡太守劉君碑

右漢薛君劉君碑已斷裂不完惟存上一段而其額尚全題漢故益州刺史中山相薛君巴郡太守宗正卿咸平侯相劉君碑古無兩人共立一碑者惟見千

此爾 金石錄

漢巴郡太守張君碑

右漢巴郡太守張君碑其前題巴郡太守都亭侯張府君功德叙云君諱訥字子郎渤海南皮人也又云炎漢龍興留侯維幹枝裔滋布竝極爵秩又云察孝廉除郎中尚書侍郎遷甘陵寃句令親病去官辟司空司徒府復辟太尉舉高第拜侍御史揚州寇賊陸梁作難王府表君中丞督捕又云丙子璽書封都亭侯無卒葬年月其後頗叙述政績而繫以銘詩蓋巴郡太守德政碑爾 金石錄

漢河南尹蘇府君碑額

右漢蘇府君碑額題漢故河南尹蘇府君碑今宣州太守張叔夜秘仲見寄云在許州道傍無文詞惟此十字其額爾按東漢時蘇氏最顯者惟蘇章嘗以河南尹徵不就其他無尹河南者意其為章碑也然章扶風平陵人而碑乃在許昌未知是否 金石錄

漢禹廟碑

右漢禹廟字畫淺細磨滅尤甚其事跡歲月皆不可考畧可見者云皮氏長安定蘇而名字亦不能辨矣

金石錄

漢禹廟碑陰

右漢碑陰題名在閩鄉楊震墓側文字磨滅不復可考其僅可見者曰侯長汾陰趙遺子宣侯上滅一字又曰故督郵曹史縣功曹鄉吏柏昱等人名鄉上又滅一字又曰西鄉亭長伯昱子政又曰鄉亭長翟國相如鄉上又滅一字又曰麟都亭長陰定安定谷口亭長方文雅方上又滅一字東門亭長梁忠千孝四望亭長吳鴻子名麟武亭長常嵩君宣其餘缺裂不先蓋楊氏子孫當時皆葬閩鄉碑碣往往磨滅此不知為誰碑也

集古錄

右漢禹廟碑陰自侯長汾陰趙遺子宣而下凡數十人姓名官爵俱存又有故督郵曹史縣功曹鄉部吏柏昱等人名最後有龍門復氏三十五戶人名在今龍門禹廟殘碑之陰而集古錄云在閩鄉楊震墓側又云楊氏子孫當時皆葬閩鄉碑碣往往磨滅此不知為誰碑者蓋誤也

金石錄

漢司空掾陳君碑額

右漢司空掾陳君碑額已殘缺不可辨惟其首八大字尚完字畫奇偉在潁川陳太丘墓側按後漢書太丘傳載二子紀湛紀為大鴻臚湛不著其為何官惟

劉孝標注世說引海內先賢傳曰諶字季方寔少子也司空掾公車徵不就蚤卒然則斯碑豈非陳諶碑乎

金石錄

漢武氏石室畫像

右漢武氏石室畫像五卷武氏有數墓在今濟州任城墓前有石室四壁皆古聖賢畫像小字八分書題記姓名往往為贊于其上文詞古雅字畫適勁可喜故盡錄之以資博覽

金石錄

漢碑陰題名一

右漢碑陰題名不知為何人碑予家集錄古文既多

或夫其所得之自然漢碑存于今者惟華岳與孔子廟最多其陰往往列修廟人姓名并記其所出錢數不過三百至五百今斯碑所題文字缺滅而中間有錢各五百四字則似是修廟人所記其人可見者有濟陰定陶蔡顥子盛山陽金鄉張諺李德河南宛陵趙堂世長南陽南鄉鄧升升遠濟陰成武周鳳李節而其餘人姓名邑里多不完又時時有故吏字不知為何人祠廟第以漢隸難得錄之爾

集古錄

漢碑陰題名二

右漢碑題名二皆不知為何碑陰其人各記所出錢

數似是漢時修廟人題名予家集錄華岳及孔子廟碑多如此此亦疑是二廟中碑前碑殘滅尤甚第時有門生濟南東郡等字而姓名無復完者後碑則有議曹功曹騎吏有蓮勺左鄉有秩池陽左鄉有秩池陽集丞有秩皆不知是何名號又有陽侯長投栩侯長則是縣吏之名其隸字不甚精又無事實可考姑錄其名號以俟知者爾

集古錄

漢殘碑

右漢殘碑不知為何人所存者纔三十三字不復成文惟云高字幼知其名高又云漢一有中字與復知為後

漢時人而隸字在者甚完體質淳勁非漢人莫能為也故錄之

集古錄

漢殘碑陰

右漢殘碑陰前後作仁字一亦磨滅不知為何人碑其知為漢碑者蓋其隸字非漢人莫能為也其字僅可見者尚數十而姓名完者九人曰王伯卿趙仲方賈元周王景陽賈元輔宗石處王仲宣馬安國王通國皆無官號邑里莫知為何人惟漢隸在者少為難得故錄之

集古錄

漢成伯著碑

右戚伯著碑首尾磨滅其畧可見者有云克列王室
遇謫于呂委位捐爵而其額題周末嗣戚氏襲以與
渤海君玄孫伯著之碑知其姓戚以文詞字畫驗之
疑東漢中葉以前人蓋當時石刻見于今者多類此
所謂克列王室遇謫于呂者戚夫人也

金石錄

漢四皓神位刻石

右四皓神位神祚凡刻石四在惠帝陵傍驗其字畫
蓋東漢時書按顏師古匡謬正俗引圜稱陳留風俗
傳自序云圜公之後圜公爲秦博士避地南山漢祖
聘之不就惠太子即位以圜公爲司徒自圜公至稱

十一世按班固述四皓但有圜公非圜公也云常秦
之時避地入商洛深山則不爲博士明矣又漢初不
置司徒安得以圜公爲之乎稱之說實爲鄙野予嘗
疑稱著書自述其世系不應妄誕如此又得四皓刻
石見其所書亦爲圜公乃知稱所述果非臆說蓋當
時所傳者如此爾至謂圜公爲秦博士及惠帝時拜
司徒者疑無所據

金石錄

神坐西漢所書鑿石爲位以爲祭也一日圜公神坐
二曰綺里季神坐三曰夏黃公神坐四曰角里先生
神坐重畫深鑿其書甚完知漢人去秦不遠其相傳

必不誤昔王元之以詩寄畢文簡稱夏黃公文簡謂
綺里季夏當為一人黃公別一人元之檢諸書得陶
淵明泊唐詩人李白輩皆言黃綺即改去此詩人皆
以文簡為據余得四皓神坐知元之非誤但昔人論
四皓或言園綺或言綺夏不必盡舉首字順則用之
或淵明自讀作綺里季夏不可知也周變曰追綺季
之迹世說曰綺季東園公夏黃公角里先生謂之四
皓姓書有綺里先生季其字也則為夏黃公無可疑
者按風俗通楚鬻熊之後為圈而鄭穆公之子圈其
後為姓至秦為博士逃難而改為圈陳留志圈公自

是秦博士周庚以常居圈中故謂圈公昔圈稱撰陳
留風俗記蔡邕集有圈典魏有圈文生皆其後也古
者角與祿同文故樂書作解鄭康成于禮角皆作祿
陳留志作角唐李涪嘗辨之

廣川書跋

跋四皓碑後

四皓之目始見于法言及漢書王貢傳序相承讀之
曰園公曰綺里季曰夏黃公曰角里先生前賢未始
有異故王黃州元之在汝州有詩云未必頸如樗里
十也應頭似夏黃公而畢文簡公嘗譏評之以謂不
當云夏黃公蓋杜子美詩云黃綺終辭漢謂之黃綺

則四皓之目宜曰園公曰綺里季夏曰黃公曰角里先生也僕初亦以爲然蓋王逸少有尚想黃綺帖陶淵明詩亦云黃綺之南山又曰且當初黃綺皆可以爲證然近歲商於耕夫得漢世石刻數種有云園公神坐綺里季神坐角里先生神坐又各有神祚几皆漢人隸書其號不應誤則與文簡之說異矣當以石刻爲正宜從舊目則前人所謂黃綺者特各取一字以目二人不必皆其首字也又園公石刻乃爲園公蓋二字音文爲近或冊牘傳寫之差亦當以園爲是按顏師古匡謬正俗有園稱陳留風俗傳自序云園

漢魯相謁孔子碑

漢不其令董君闕銘

漢膠水縣王君廟門碑

漢茹君頌 金石錄云字書似後魏時人

堯廟碑 以下世次無考凡出水經注者俱附之漢魏之間

魏土地記白平陽城東十里原上有小臺臺上有堯

神屋石碑 水經注

邵陽文母廟碑

邵陽故有莘邑爲太姒之國詩云在邵之陽在渭之涘城南有瀆水東注于河水南猶有文母廟前有碑

去城一十五里水即郃水也縣取名焉 水經注

介子推廟碑

晉陽城南舊有介子推祠前有碑廟字傾頽惟單碑獨存又今文字剝落無可尋也 水經注

周世王名號碑

洛水逕柏亭又東北逕三王陵三王或言周景王悼王定王也今陵東有石碑錄赧王以上世王名號考之碑記周墓明矣 水經注

楚大夫宋玉墓碑

宜城城南有宋玉宅有古碑猶存 水經注

塗君祠銘

漢安縣江水北岸有塗山而有夏禹廟塗君祠石銘存焉常璩仲雍竝云禹娶于此予按羣書咸言禹娶在壽春當塗不在此也 水經注

龍沙碑刻銘

南昌龍沙有人于此得古冢碑刻題云西去江七里半筮言其吉上言其水而今此冢垂沒千水所謂筮短龜長也 水經注

華君碑

武當縣世祖封鄧晨子堂為侯國內有一碑文字磨

滅不可復識俗相傳言是華君銘亦不詳華君何代之士水經注

左伯豪碑

沮陽縣南有二碑碑字紊滅不可復識云是左伯豪

碑水經注

句陽刻石

句陽縣北山有玄書崖高五十丈刻石作字今人不能上水經

闕林記郭先生二碑

沂水又南逕闕林山東本郡陸道之所由山東有二

碑其一即記闕林山文曰君國者不躋高烟下先時或斷山岡以通平道民多病守長冠軍張仲踰乃與邦人築斷故山道於此銘其一郭先生碑先生名輔字甫成有孝文悅學之美其女爲立碑於此蓋無年號不知何代人也水經注

右漢郭先生碑云諱輔字甫成其先出千王季之中子爲文王卿士食采于虢後世調之郭歷戰國秦漢子孫派分來居荆士先生其少也孝友而悅學其長也寬舒如好施是以宗親歸懷鄉鄰高尚年五十有二遇疾而終其以而爲如及用鄉鄰字與婁壽碑同

蓋漢人如此爾

右不見書撰人名氏碑在襄州穀城縣界中其辭云云至于武王錫而封之後世謂之郭春秋之時為晉所并歷戰國秦漢子孫派分來居荆土氏國立姓焉傳云聖賢之君必有達者先生應焉云云其文字古質蓋漢之碑也其以如字為而即春秋書隕如雨釋者曰如而也然施千文章以如為而始見于此集古錄右郭先生碑集古錄以為漢碑按後魏郟道元注水經俱載此碑云碑無年號不知何代人然則歐陽公何所據遂以為漢人乎予以字畫驗之疑魏晉時人

所為既無歲月可攷始附于漢之碑次云金石錄

逢君殘碑

山陽府卒史司馬雷碑

督郵班碑

百山復民碑

首山復戶姓名

鍾君碑

魏曹仁記水碑建安二十四年

平魯城南半淪水建安中關羽圍于禁于此城會沔水泛溢三丈有餘城陷禁降龐德奮劍乘舟投命于

東園城西有曹仁記水碑杜元凱重刻其後書伐吳之事也

水經注

魏大饗碑 延康元年

魏書曰太祖作議郎告疾歸鄉里築室城外習讀書傳秋冬射獵以自娛樂文帝以漢中平四年生於此上有青雲如車蓋終日乃解即是處也後文定以延康元年幸醮太饗父老立監于故宅壇前樹碑碑題云大饗之碑 水經注

古魏大饗碑魏志文帝以建安二十五年嗣位為丞相魏王改元延康夏六月南征秋七月甲午軍次於

譙大饗六軍及譙父老今以碑考之乃八月辛未蓋魏志誤也是時不為丞相漢獻帝猶在位雖改去王室已久然操之死纔數月爾不軍次舊里初無念親之心方與羣臣百姓置酒高會設伎樂而臣下乃相與伐石夸功豈不可笑也哉

金石錄

○ 魏受禪碑 黃初元年

右魏受禪碑世傳為梁鵠書而顏真卿又以為鍾繇書莫知孰是按漢獻帝紀延康元年十月乙卯皇帝遜位魏王稱天子又按魏志是歲十一月葬士卒死亡者猶稱令是月丙午

一作寅

漢帝使張愔奉璽綬庚

午王升壇受禪又是月癸酉奉漢帝爲山陽公而此碑云十月辛未受禪于漢三家之說皆不同今據裴松之注魏志備列漢魏禪代詔冊書今羣臣奏議甚詳蓋漢實以十月乙卯策詔魏王使張惛奉爾綬而魏王辭讓往返三四後受也又據侍中劉廙奏問太史令許芝今月十七日巳未可治壇場又據尚書令桓階等奏云軾下太史令擇元辰今月二十九日可登壇受命蓋自十七日巳未至二十九日正得辛未以此推之漢魏二紀皆謬而獨此碑爲是也漢紀乙卯遜位者書其初命而畧其辭讓往返遂失其實爾

魏志十一月癸卯猶稱令者當是十月衍一字爾

午張惛奉爾綬者辭讓往返容有之也惟庚午升壇最爲繆爾癸卯去癸酉三十一日不得同爲十一月此尤繆也禪代大事也而二紀所書如此則史官之失以惑後世者可勝道哉

集古錄

魏公卿上尊號表

黃初元年

右魏公卿上尊號表唐賢多傳爲梁鵠書今人或謂非鵠也乃鍾繇書爾未知孰是也嗚呼漢魏之事讀其書者可謂之流涕也其鉅碑偉字其意惟恐傳之不遠也豈以後世爲可欺與不然不知耻者無所不

爲乎 集古錄

魏孔子廟碑 黃初元年

右魏孔子廟碑按魏志文帝以黃初二年正月下詔以議郎孔羨爲宗聖侯奉孔子之祀及令魯郡修起舊廟今以碑考之乃黃初元年又詔語時時小異亦當以碑爲正 金石錄

魏橫海將軍呂君碑 黃初二年

魏西河恭王碑 黃初二年

茲氏縣魏黃初二年西河恭王司馬子盛廟碑又云西河舊處山林漢末擾攘百姓失所魏興更開疆宇

分割太原四縣以爲邦邑其郡帶山側塞矣王以咸寧四年改命爵土其年十二月喪國臣大農閣宗離石令宗羣等二百三十四人刊石立碑以述勲德 經水注

魏千金塢石人銘 太和五年

洛陽記曰千金塢舊堰谷水魏時更修此堰謂之千金塢積石爲塢而開溝渠五所謂之五龍渠渠上立塢塢東首立一石人石腹上刻勒云太和五年二月八日造築此塢更開溝渠蓋魏文帝修王張故績也塢是都水修使者陳協所造晉世大水暴注溝瀆世

壞又廣功焉石人東脇下文畧云晉太康七年六月大水壞塌更于西開泄名曰代龍渠若五龍歲久復壞可轉千西更開二場二渠合用二十三萬餘功以其年十月起作到八年四月畢後張方入洛破千金碣公私賴之水積年久渠塌頽毀石砌殆盡遺基見存朝廷太和中修復故為按石人西脇文畧云若千後當復興功者宜就西頽故書之于石以遺後賢舊瀆又東晉惠帝造石渠于水山按橋西門之南頽文稱元康二年十一月改治石巷水門到三年三月畢

注

水經

魏龍門禹廟碑

太和中

魏土地記曰梁山北有龍門山大禹所鑿通孟津河口巖際鑿蹟遺功尚存岸上并有廟祠祠前有石碑三所二碑文字奈滅不可復識一碑是太和中立

注

水經

魏車騎將軍黃樞碑

青龍二年史定伯附

南陽預山有魏黃樞夫妻二冢地道潛通冢前有四碑其二魏明立一是其子及臣吏所樹者也又有史定伯碑

水經注

魏伍子胥廟碑

青龍二年

河水又東北逕伍子胥祠祠在北岸瑱丘郡界臨側
長河廟前有碑魏青龍三年立水經注

魏范式碑青龍三年

右范式碑法書要錄云蔡邕書今以碑考之乃魏青
龍三年立非邕書也水經注

右漢廬江太守范式碑式仕漢爲侍御史拜荊州刺
史遷守廬江官亦不早而史氏列之獨行傳中蓋以
式之可重者在厚于友誼其官爵固可畧也此碑但
云篤友足以輔仁及云超管約之遐踪其外更無他
語洪丞相謂未足以光闕盛德是已唐李嗣真書後

品以碑爲蔡伯喈書考之碑立于魏明帝青龍三年
則非伯喈之筆明矣後鄭氏金石錄亦云是蔡公書
則又承書品之誤也金石錄

魏葉公廟碑景初元年

葉縣葉公廟秦漢之世廟道有雙關几筵黃巾之亂
殘毀顏闕魏大和景初中令長修飾舊宇後長汝南
陳晞以正始元年立碑碑字破落遺文殆存事見其
碑水經注

古今法書苑卷之六十一

古今法書苑卷之六十二

吳郡王世貞元美甫編 雲間王乾昌伯元甫校

十三之石

吳徐孺子墓碑

嘉禾七年實
魏景初二年

徐孺子墓吳嘉禾中太守長沙徐熙於墓隧種松太

守南陽謝景干墓側立碑永安中太守梁郡夏侯嵩

於碑傍立思賢亭

水經注

魏太僕荀君碑

正始五年

右魏太僕荀君碑其額題魏故太僕西陽亭成侯荀
府君之碑碑已殘缺其可見者嘗為齊相始平太守

大將軍長史封西陽亭侯遂爲太僕春秋五十有一
正始五年夏六月丙寅薨惟其名字鄉里磨滅不可
考矣 金石錄

魏南郡太守卞統碑

右魏南郡太守卞統碑在今曹州宛句縣所敘世次
官闕甚簡又多殘缺其略云君諱統字建業又云惟
帝念庸命以南邦又云嘉平二年十一月己亥寢疾
卒官而其首題魏故南郡太守卞府君之表按晉書
卞壺傳濟陰宛句人祖統琅邪內史而元和姓纂亦
云統爲晉琅邪內史今此碑殘缺處猶有琅邪尚存

知其嘗爲此官而統以魏嘉平中卒姓
者諛也 金石錄

魏李君祠石的銘 正始五年

正始三年甲子被癸丑詔書割河南創滎陽郡李勝
字公照爲郡守政有遺惠民爲立祠于城北五里號
曰李君祠廟前有石躡躡上有石的銘具存其畧
云百族欣戴咸推厥誠今猶祀禱焉 水經注

吳皇象隸字 建興元年實
魏嘉平四年

皇象書吳大帝碑在江寧府雖本漢隸然探竒振古
有三代純朴氣自是絕藝自王志愔定錄古今書象

已在著錄中至庾肩吾以象品人上中其後李嗣真因之羊欣稱象善草書而張懷瓘惟稱象小篆入能品今官書有象章草帖故自精深竒崛前世評書者獨不言象爲隸字何也余疑此碑近出書畫尚完故是前人未見象尺書曰太子屏風在此已久而未得之又曰想必醉令作鯉魚梅羹相待其自務矜持如此

廣川書跋

魏潁州刺史賈逵祠碑 正元三年

項縣故城舊潁州治有刺史賈逵祠昔王凌爲司馬懿所執屈廟嘆曰賈良道王凌魏之忠臣唯汝有靈

知之遂仰鵠而死廟前有碑碑石金生千寶曰黃金可採爲晉中興之瑞

水經注

右魏賈逵碑魏志逵傳云逵爲絳邑長爲賊郭援所攻絳人與援約不害逵乃降而援欲以逵爲將怒逵不肯叩頭欲殺之絳人乘城呼曰若要殺我賢君寧俱死援義之遂不殺又按裴松之注引魏畧云援捕得逵怒不肯拜促斬之諸將覆護因於壺關土窖中守者祝公道釋其械而逸之與魏志不回而此碑但云爲援所執臨以白刃不屈而已不載絳人約援事如傳所載不獨逵有得于絳人而絳人臨危能與逵

生死亦可謂賢矣自古碑碣稱述功德嘗患過實如
逵與絳人德義碑不應略而不著頗疑陳壽作傳好
竒而所得非實也松之又志魏書逵年五十五而碑
云五十有四亦當以碑爲正

集古錄

魏穀城令劉熹學生家碑 正元三年

縣東則濟南劉熹碑熹字德怡魏時宰縣博學好古
立碑載生徒百有餘人不終業天者因葬其地號曰
生墳

水經注

右魏劉熹學生家碑在襄州穀城縣界中余爲乾德
令時嘗以公事過穀城見數荒冢在草間傍有古碑

半埋土中間其村人皆不能道而碑文磨滅不暇讀
後數年在河北集錄古文思嚮所見疑爲漢碑求之
又數年乃獲按襄州圖經云學生冢在縣東北今碑
雖殘缺而熹與生徒名字往往尚可見云

集古錄

魏襄州刺史劉君碑 正元三年

魏弘農石隄祠銘

甘露四年

柏谷水出弘農縣兩石隄山山下右石隄銘云魏甘
露四年散騎常侍征南將軍豫州刺史領弘農太守
南平公之所經建也

水經注

魏襄陽太守胡烈碑

景元四年

恨州洲爲水所壞襄陽太守胡烈有惠化補塞堤決
民賴其利景元四年九月百姓刻石銘之樹碑于沔
水水經注

魏母丘興盛碑

以下俱魏時碑年次無考

穀水逕魏將作大匠母丘興盛墓南二碑存焉儉父
也管輅別傳曰輅嘗隨軍四征過其墓而歎謂土友
曰玄武藏頭青龍無足白虎衝尸朱雀悲哭四危已
備法應滅族杲如其言水經注

世謂母丘興盛碑比蔡邕石經無相假借惜其書不
見於世觀晉人評書以索靖比王逸少而歐陽詢至

臥碑下筆墨妙絕不待見其書然後信也近世惟淳
化官帖中有靖書其後購得月儀十一章今入續帖
中筆畫勁密它人不能眦眦然與前帖中書亦異不
知誰是李嗣真曰靖有月儀三章今月儀不止三章
或謂昔人離析然書無斷裂固自完善殆唐人臨寫
近似故其書剞劂逕出法度外有可貴者廣川書跋

魏郭淮南碑

渭水東分爲二水東北流逕魏雍州刺史郭淮南碑

水經注

魏征南軍司張詹碑

冠軍縣有張詹墓碑碑背刊云白楸之棺易朽之棠
銅鐵不入凡器不藏嗟矣後人幸勿我傷自後古墳
舊冢莫不夷毀而是墓至元嘉初尚不見發六年大
水蠶饑始被發掘說者言初開金銀銅錫之器朱漆
雕刻之飾爛然有二朱漆棺棺前垂竹簾隱以金釘
墓不甚高而內極寬大虛設白楸之言空負黃金之
實雖意固南山寧同壽乎 水經注

魏滄州刺史劉岱碑

潞陽城南有岱碑地理風俗記曰平原潞陰縣今巨
澤亭是也 水經注

魏恒山東西二廟碑

恒山下廟非漢末喪亂山道不通舊有下階神殿魏
改有東西二廟廟前有碑闕壇場相列焉 水經注

魏殘碑陰

魏太保任公神道

晉七賢帖 魏晉之間

右晉七賢帖得之李丕緒少卿家丕緒多藏古書然
不知此爲真否七子書蹟世罕傳故錄之

長安李丕緒得晉七賢帖世疑劉伶作靈然其字伯
倫知爲伶也書尤怪詭不類昔經范文正公歐陽文

忠公蔡文忠公諸人題識故後世不復議予於官書中見山濤阮籍嵇康書皆入作者闡域而不見劉伯倫書他書稱曰有劉伶善書畫當世號文學士豈此書是耶唐初購書以金故人得偽造當時李懷琳好爲僞迹用意至到或得亂真昔人謂急就章爲王逸少書七賢帖假云薛道衡作序裝背持以質錢所用繭紙皆謝道士所爲尤使臨書故懷琳書皆繭紙薛道衡序蓋後人所爲得劉靈書因以附之嵇舍云衆口異賈羣自改望陸景云衆口毀譽浮石沉木今此一書略而論者異詞欲來者不惑不可得也世人

信耳而不信目故凡造妄架僞者舉得進也前人評畫謂耳中有畫目中無畫余於評書亦云

廣川書毀

晉辟雍行禮碑

秦始皇二年

右經北有晉辟雍行禮碑是秦始皇二年立其碑中折但世代不同物不停故石經淪缺存半毀幾駕言永久諒用憮焉

水經注

晉宋均碑

秦始皇三年

馬懷橋長水出新城西山東逕晉使持節征南將軍宋均碑南均字文平縣人也其碑秦始皇三年十二月

水經注

晉南鄉太守司馬整頌

秦始皇四年

右南鄉太守司馬整頌按晉書宣帝弟曰安平獻王孚孚次子曰義陽成王望望第三子曰隨穆王整整先望卒後武帝分義陽之隨縣封整爲王謚曰穆整以魏咸熙二年爲南鄉太守是歲晉武受禪改元秦始皇三年從整南陽而南鄉人爲整建此碑晉書地理志當魏本荊州分屬三國而南鄉南皆屬魏後晉武改南鄉爲順陽此碑今在光化軍軍卽襄州穀城縣之陰城鎮陰城當魏晉時爲南鄉屬縣也余取乾德縣令時得此碑右南鄉太守碑不著書撰人名

氏題曰宣威將軍南鄉太守司馬府君紀德頌碑云君諱整字孔修云云按晉志不列南鄉郡據此碑所載縣令名氏有武陵築陽丹水陰城順陽析六縣此蓋南鄉郡所治也晉志但云南鄉魏時屬荊州武帝平吳改爲順陽郡而不著順陽治所與廢屬縣之名而獨此碑可見也又整傳但云整歷南中郎將封清泉侯薨贈冠軍將軍亦不言其爲宣武將軍南鄉南陽二郡守皆其所漏畧也

集古錄

晉宣威將軍南鄉太守司馬整德頌秦始皇四年己巳建書爲隸古氣質渾厚與鴻都石經可一二校也碑

言整安平王孫義陽王子仕魏拜郎中歷治書侍御
史咸熙二年出臨宛加宣威將軍就拜世子泰始三
年十一月使者奉詔冊命爲中郎將統茲宛郡今考
晉書義陽世子弈卒整嗣封清泉侯追贈冠軍將軍
其官爵歲月與碑畧不同碑自泰始四年建則侯于
清泉皆自宛郡後然頌曰出臨鄙郡自託於詞亦何
陋也漢之衰文物隨救至晉不勝淺陋論述次第亦
已失當整在當時公族一少年名爵未立頌至謂稟
乾坤之純靈並聖賢而誕興其在南郡謂洪恩淪乎
不測覆養包乎無外巍巍之功揚于及陋其受冊命

慶雲隨之夫儼人必於其倫非其倫者人不得受之
文字之壞至此可嘆也

廣川書跋

右晉南鄉太守司馬整頌云初仕魏拜郎中中郎議
郎諫議大夫騎都尉給事中轉拜治書侍御史咸熙
二年出臨鄙郡加宣威將軍又云謁者就郡拜君世
子執節四讓推與兄嗣固辭懇誠泰伯三美君又加
焉又云泰始三年十一月使者奉詔策命君南中郎
將牧就統宛都按晉史整事蹟附見安平獻王孚傳
後云兄弈卒以整爲世子歷南中郎將封清泉侯早
卒其餘官闕皆不載據史言兄弈卒以整爲世子而

碑言推與兄嗣二說不同當以碑爲正

金石錄

晉司馬整碑陰

右南鄉太守碑陰將吏三百五十人分爲二卷其磨滅者猶有二十餘人皆有邑姓名氏而無次序其名號有令有長有南閣祭酒門下督主簿部督郵監汀督郵勸農五官掾營軍掾軍謀掾府門亭長主記史待事掾待事史部曲將部曲督又有賊曹功曹議曹戶曹金曹水曹科曹倉曹鎧曹左右兵曹曹皆有掾又有祭酒有史有書佐有修行有從掾位有從史位有史有小史等魏晉之際太守官屬之制蓋如此他

書或時見一二不能如此之備也

集古錄

晉南鄉郡建國碑

右晉南鄉郡建國碑已斷裂不完其額題南鄉郡建國之碑其大畧云嘉平五年漢水滔溢毀壞舊城又云正元二年城此其餘文字可識處大畧述遷郡事而銘文有與晉常存之語知其爲晉碑也按晉書地理志建安十三年魏武帝盡得荊州之地分南陽縣西界立南鄉郡及晉武平吳太康中改南鄉爲順陽而不載遷郡事此碑蓋晉太康以前立故仍爲南鄉也碑有云河內司馬府君者整也嘗守是郡自有碑

此碑既無建立年月因附于整之次云 金石錄

晉昌原侯鄭仲林碑 泰始六年鄭廟碑附

林水逕縱氏城西水之西南有晉城門杖尉昌原恭

侯鄭仲林碑泰始六年立又有司空密林光侯鄭廟

碑文缺不可復識 水經注

晉北嶽祠堂頌 泰始六年

吳九真太守谷府君碑 鳳凰元年實
泰始八年

右谷朗者仕吳為九真太守碑無書撰人名氏其序

云府君諱朗字義先桂陽耒陽人豫章府君之曾孫

府君之孫郎中君之子也其先出自顓頊益為虞

舜賜姓嬴氏至于扉子封于秦谷因而氏焉谷氏在

吳不顯史傳無所見所謂豫章府君而下三世皆莫

知其名字按秦本紀非子邑于秦而此與朗子永寧

侯相碑皆為扉子莫詳其義也 集古錄

吳臨海侯相谷府君碑 無年月附于其父碑之次

晉立魏大長秋游君碑 泰始十年

右大長秋游君碑云君諱述字庶祖按元和姓纂云

魏河南尹游述始居廣平六代孫後魏尚書明根生

僕射肇今碑亦云述廣平人惟姓纂云述為河南尹

以碑考之蓋未嘗為此官又按後漢書百官志大長

秋承秦將行官者景帝時更名大長秋或用士人中
與常用官者並嘗爲宛句長尚書即左丞元城令治
書侍御史南安北海安平東郡太守符節令遂爲大
長秋皆非官者之職然則魏制蓋亦參用士人矣錄

晉游君碑陰

右游君碑陰按王莽嘗下令禁二名故當時士人皆
以一字爲名東漢時尚爾今此碑陰所記凡二百五
十三人亦無一人二名者碑晉咸寧中建距莽時二
百年矣而士大夫猶遵莽之令不變何哉金石錄

吳禪國山碑

天冊元年實
晉咸寧元年

右吳禪國山碑者孫皓天冊元年禪于國山改元天
璽因紀其所獲瑞物刊石于山陰是歲晉咸寧元年
後五年晉遂滅吳以皓昏雲其國將亡而衆瑞並出
不可勝數后世言祥瑞者可以鑒矣集古錄

右吳禪國山碑其前敘孫皓卽位以後郡國祥瑞足
千餘其後云乃以浣灘之歲欽君昊天月正華元郊
天祭地紀號天璽又云丞相沈大尉璆大司徒燮大
司空朝等以爲今衆瑞畢至宜先行禪禮紀勒天命
遂於吳興國山之陰告祭刊石按皓以丙申歲改元

天璽碑言君難之歲是也刻石後四年遂爲晉所俘矣金石錄

輿斷碑天璽元年實
晉咸寧二年

右吳天璽元年斷碑其前云上天帝言又云帝曰大吳一萬方又云天發神讖文天璽元年七月巳酉朔又云天讖廣多不解解者十二字嗚呼其言可謂妖矣據吳志天璽元年秋八月鄱陽言歷陽山石理成字凡二十明年改元大赦以協石文今此碑乃在金陵驗其文與吳志所載亦異莫可考究孫皓在位凡八改元而六以符瑞假托神恠以矯誣天命其不終

宜矣金石錄

晉羊祜墮淚碑咸寧五年

羊祜之鎮襄陽也與鄰潤甫嘗登峴山及祜薨後人立碑于故處望者悲感杜元凱謂之墮淚碑又有征南將軍胡罷碑又有征西將軍周訪碑水經注

晉襄陽三碑太康元年

襄陽郡城南道東有三碑一碑是晉大傅羊祜一碑是鎮南將軍杜預一碑是安南將軍劉儼水經注

晉方山杜元凱碑太康元年
襄陽方山下潭中有杜元凱碑元凱好尚後名作兩

碑並述已功一碑沉之岷山水中一碑下之于此潭
曰百年之後何知不深谷爲陵也山上有鄒恢碑魯
宗之所立也

水經注

晉梁柳修嶠山路銘

太康三年

漢建安中曹公討巴蜀惡嶠山南路之峻更開北道
自後行旅多從之今山側附路有石銘云晉太康三
年弘農太守梁柳修復舊道太嶠以東西嶠以西明
非一嶠也西有二石又南五六步臨溪有恬漠先
生翼神碑蓋隱斯山也

水經注

晉右軍將軍鄭烈碑

太康四年

右晉鄭烈碑云君諱列字休林又云曾祖先生皇祖
徵君顯考將作大匠實有茂德載在國策烈晉史無
傳以碑考之嘗爲文帝參佐武帝時爲兗州刺史封
東莞男以疾徵拜議郎卒于太康二年追贈右軍將
軍謚曰僖侯云

金石錄

晉梁王妃王氏碑

太康五年

睢陽城內東西道有王氏陵表並列二碑碑云妃諱
祭字之儀東萊曲城人也齊北海府君之孫司空東
武景侯之季女咸熙元年殯于司馬氏泰始二年妃
于國太康五年薨營陵于新蒙之原太康九年立碑

水經注

晉太公碑

大康十年

太公廟碑今在衛州共縣晉大康十年立其文可識
曰太公望者此縣人太康二年縣之西偏有盜發冢
而得竹策之書書藏之年當秦坑儒之前八十六歲
其周志曰文王夢天帝服玄襪以立于冷狐之津帝
曰昌賜汝望文王再拜稽首太公於後再拜稽首文
王夢之夜大公夢之亦然其後文王見太公而訊之
曰而名爲望乎谷曰唯文王曰吾如有所見太公言
其日且□其言臣以此得見也文王曰有之有之遂

與歸以爲卿士其紀年錄曰王六年齊太公卒蓋壽
一百一十餘歲史記謂東海上人西伯與語大說曰
自吾先君太公望子久矣故號之曰太公望又曰呂
尚處世隱海濱西伯拘羑里散宜生閔天素知而招
呂尚言呂尚所以事周雖異然要之爲文武師蓋不
得其詳迺廣徵異說其謂東海上人則得於孟子其
先君望子則得于墨子至拘羑里則戰國辯士之論
也灼龜而得兆立以爲師今緯書有之曾不知諸侯
無太師而東海時避紂爾則得以爲卿士其說是也
詩曰維師尚父則知爲武王師也竹書最古當魏安

釐王時國史則所書宜可信其言服玄襮而說文無此字惟曰漢令改衣耕謂之褻而衛宏字詭與昭卿字指則有之如許慎所遺古文衆矣昭卿因宏以有記非得是碑豈知宏之爲有據哉晉記言咸寧五年盜發汲冢與此碑異知史誤也

廣川書跋

右晉太公碑其畧云太公望者此縣人晉太康十年縣之西偏有盜發冢而得竹策之書書藏之年當秦坑儒之前八十六歲今以晉書武帝紀考之云咸寧五年汲冢人掘魏襄王冢得竹簡小篆古書十餘萬言藏于秘府與此碑年月不同碑當時所立又荀勗

校穆天子傳其敘亦云大康二年與碑合可以正晉史之誤其曰小篆書亦繆也且其書旣在坑儒八十六歲之前是時安得有小篆乎碑又云其周志曰文王夢天帝服玄襮襮字字書所無以立于令狐之津帝曰昌賜汝望文王再拜稽首太公於後亦再拜稽首其夜太公夢亦然而史記太公世家曰西伯遇太公於渭之陽與語太悅曰自吾太公望子久矣故號之曰太公望二說殊不合而王逸注楚詞與碑所書畧同逸時此書未出必別有所據碑有云其紀年曰康王六年太公望卒參考年數蓋壽一百一十餘歲而史記

亦不載按前世所傳汲冢諸書獨有紀年穆天子傳
師春等不載所謂周志者不知爲何書而杜預左氏
傳後叙云汲冢書凡七十五卷皆藏秘府預親見之
以此知不特十萬餘言太公碑汲縣令盧無忌立後
題太康十年三月云 金石錄

晉雲南太守碑

永熙元年

右晉雲南太守碑文字殘缺其姓氏名字鄉里皆不
可考畧可見者嘗爲尚書令史察孝廉除郎中遷武
陽令從龍驤將軍王濬征討遷雲南太守年五十有
七卒最後題太熙元年正月上旬造太熙武

也 金石錄

晉護羌校尉彭祈碑

元康一年

右晉彭祈碑云君諱祈字子玄隴西襄武人也其先
出自顓頊有陸終之裔子大彭實主夏盟則其後也
又云歷郡石職州別駕從事洮西戰列上功狀除害
人還參本軍事除涼州護軍河右未清遷西郡太守
復臨酒泉母老弟亡辭職轉洛陽太守近家祿養遂
暉大艱有詔授君節蓋除護羌校尉統攝涼玉前後
軍功應封七侯勞謙退讓陰德不代年未知命以太
康十年三月癸酉薨天子遣使者監護喪事賜策痛

惜故孝廉參議羌軍事酒泉馬朔故吏郎中綦毋番
王簿郭曉良吏夏侯俊等追思洪烈乃刊石勒銘焉
西晉石刻見千今者絕少又多殘缺此碑文字完好
可喜乃錄其終始事蹟于此

金石錄

晉彭祈碑陰

石彭祈碑陰題名者凡三百十二人有故孝廉計掾
計史良吏廉史計佐主簿領校錄事中部督郵西部
督郵軍議從事和戎從事記室督軍謀從事錄事史
戶曹史賊曹史金曹史田曹史倉曹史鏡曹史兵曹
史容曹史記室史節史車曹史永部都督中部都督

功曹典事武猛從事舍人蜀渠都水行事中部勸農
西部勸農東都水蜀渠平水門下賊曹門下議生錄
事金曹掾兵曹掾作部史法曹史參戰騎督步督散
督門下書佐弓馬從事監牧史戟史金曹典事武猛
史門下通事門下小史凡一官多者十人少者不減
數人其餘稱故吏無官號者百六十餘人當時州郡
官屬其濫如此蓋自漢以來太守皆得自置僚佐
彭君爲邊郡守故其所辟尤衆今盡錄其名號以見
一時之制焉

金石錄

晉九山廟碑

元康二年

白相澗水逕九山山際有九山廟廟前有碑云九顯
靈君者太華之元子陽九列名號曰九山府君也南
據松岳北帶洛澗元康二年九月遣殿中中郎將關
內侯樊廣縱氏令王與傳演奉宣詔命興立廟殿焉

水經注

晉議郎陳先生碑 元康二年

晉元康二年殘碑

晉劉靖二碑 元康四年

燕國大城東門內道左有魏征南將軍建城鄉景侯
劉靖碑晉司隸校尉王容表功加于民宜在祀興以

元康四年九月二十日刊石建碑楊於後葉矣

堰水逕劉靖碑靖字文公沛國人弘之父以嘉平二

年過水開渠元康五年十月十一日刊石立表以紀

卽烈并記過水制度永爲後式焉

水經注

晉胡均碑 元康八年

鹿邑城南十里有晉中散大夫胡均碑元康八年立

水經

晉太子詹事裴權碑 元康九年

晉百蟲將軍顯靈 永康元年

右九山碑云并軍姓伊氏諱益字墮敬帝高陽之弟

二子泊益者也元康五年七月七日順人吳義者建立堂廟永康元年二月二十日刻石立頌贊示後賢矣水經注

晉光祿向凱碑永康元年

右晉向凱碑云君諱凱字士伯河內山陽人也其後歷寂官閔甚詳其最顯者嘗為中書侍郎尚書吏部郎洽車黃門侍郎賜爵開中侯廣平太守散騎常侍游擊將軍北中郎軍司兗州刺史中郎將後云累遷河南尹春秋六十有八元康九年四月甲子薨追贈光祿勳據此乃當時顯人而晉史無傳故其事跡莫

得而考金石錄

晉帛仲理墓碑永寧二年

瀍水東與千金渠合水西南有帛仲理墓墓前有碑題云貞人帛君之妻仲理名護益州巴郡人晉永寧二年十一月立水經注

晉鴻臚成公重墓刻永寧二年

右晉成公重墓刻云永寧二年四月辛巳朔十五日乙未守鴻臚關中侯成公重魏夫人之靈柩前世以永寧紀年者二漢安帝晉惠帝偽趙石祇按三國志建安二十年曹操始置關中侯十七級安帝時猶未

有此號而石祗永寧無二年然則重蓋惠帝時人也
晉史有成公簡成公綏皆東郡白馬人 金石錄

晉潘岳子父二墓碑

太安

□

羅水逕袁公塢又逕潘岳子父墓前有碑岳父此琅
邪太守碑石破落文字毀敗岳碑題云給事黃門侍
郎潘君之碑碑云君遇孫秀之難闔門受禍故門生
感覆醢以增慟乃樹碑以記事太常潘尼之辭也 水經注

晉范西戎碑

永嘉二年

王隱晉書地道記曰陶朱家在華容縣樹碑云是越

之范蠡晉太原地記盛弘之荊州記劉澄之記並言
在縣之西南郭仲產言在縣東十里檢其碑題云故
西戎令范君之墓碑文缺落不詳其人稱蠡是其先
也碑是永嘉二年立觀其所述最爲完悉似親逕其
地故違衆說從而正之 水經注

晉譙定王碑

永嘉三年

過水南有譙王司馬士會冢冢前有碑永嘉二年立
石掾云晉故使持節散騎常侍都督揚州江州諸軍
事安東大將軍譙定王河南温公司馬墓之神道 水經注

晉司馬子長墓碑 永嘉四年

子長墓在夏陽墓前有廟廟前有碑永嘉四年漢陽太守殷濟仰瞻遺文大其功德遂建石室立碑樹柏太史公自叙曰還生千龍門是其墳墟所在矣 水經注

晉張孟陽劔閣銘 永嘉

小劔大劔連山絕峻飛閣涌衝故謂之劔閣也張載銘曰一人守峻萬夫越超信然 水經注

晉荊州刺史胡奮碑 永嘉中王世將附

江夏舊治安陸吳徙陸渙城中有晉征南將軍荊州刺史胡奮碑又有平南將軍王世將刻石記征杜曾

事 水經注

晉二王碑 永嘉

范陽郡今理涿縣故城城內東北角有晉康王碑城東有范陽王司馬虓碑 水經注

晉太原王碑 永嘉

魏土地記曰晉陽城東有晉時持節都督并州諸軍事鎮北將軍太原成王之碑 水經注

晉金鄉長薛君頌 西晉時

右薛君頌在今濟州金鄉縣其額題故金鄉長汝南薛君之頌云君諱諱字公謀其他文字皆完好驗其

詞蓋縣長德政頌爾雖無建立年月而有吳寇未
下
字耀威海隅之語知其為晉碑也
金石錄
晉張平子墓碑
西晉時

右張平子碑晉南陽相夏侯湛撰識緯之說與于西
漢之末而爛熳于東漢之世雖一時名儒皆從而惑
焉獨平子奮然辟之甚力予嘗歎以為如平子可謂
豪傑之士不為流俗所移者今湛為此碑乃云金匱
王版之奧識契圖緯之文罔不該羅可謂不知平子
矣
金石錄

晉青山君神頌
西晉時

晉安邑令徐君碑
西晉時

偽漢司徒劉雄碑
嘉平五年實
晉建興二年

右偽漢劉雄碑其額題漢故使持節侍中太宰司徒
公右部魏成獻王之碑碑云公諱雄字元英高皇帝
之胃孝宣帝玄孫值王莽篡竊遠遁遼朔為外國所
推遂號單于累葉相承家雲中因以為桑梓焉雄劉
元海弟也晉書載紀元海本匈奴冒頓之後冒姓劉
氏碑後題嘉平五年建安莒公紀年通譜劉聰以懷
帝永嘉四年即偽位明年改元嘉平嘉平四年改元
則嘉平豈復更有五年蓋載紀初不編年故於改元

歲月難考此碑當時所立不應差訛乃通譜誤也錄 金石

偽趙浮圖澄造釋迦像碑

光初五年實
晉永昌元年

右趙浮圖澄造釋迦像碑唐封演聞見記云內丘縣西古中丘城寺有碑後趙石勒光初五年立碑云大和上竺浮圖澄者天竺大國附庸小國王之元子也本姓濕此碑即漢所見其說皆同按晉書藝術傳澄本姓帛氏今碑作濕碑當時所見宜得其真又史作佛圖碑作浮圖碑二字音相近爾惟光初乃劉曜年號而以爲石勒時當演誤也 金石錄

晉陸禕碑

太寧三年

晉陸禕碑此碑云禕字元容吳郡吳人其先家于陸鄉因氏姓焉顯考吳左丞相禕亦烏六年故召宿衛郎中轉右郎中左郎中治書執法平中校尉平義都尉五官郎中騎都尉遷黃門侍郎封海鹽縣侯加裨將軍行左丞相鎮西大將軍事又云委戈執人寶皇儲而吳志云孫皓大鼎元年以陸凱爲左丞相又云凱子禕初爲黃門侍郎出領部曲拜偏將軍凱亡後入爲太子中庶子皆與此碑合而此碑晉太寧三年立也

晉陸喈碑 咸和七年

右晉陸喈碑喈為宣威內史建武元年卒碑以咸和七年立而碑後題云咸和七年歲在庚辰咸和成帝年號也成帝以太寧二年八月即位是歲乙酉明年改元咸和據曆七年當為壬辰而此云庚辰者繆也陸氏有二碑余家集錄皆有之據陸禕碑後題云太寧二年歲在乙酉與今曆合則當時曆官不應至咸和而頃爾差失然則庚辰特書碑者誤爾 集古錄

偽趙橫山李君神碑

建武六年實
晉咸康五年

右趙橫山李君神碑題建武六年歲在庚子三月己

亥二十一日癸丑案晉書帝紀石虎以咸和九年自立為趙天王而載紀云咸康元年僭稱居攝趙天王據帝紀則建武六年歲在己亥據載紀則歲在庚子宋莒公紀年通譜獨以本紀為據今此碑及西門豹祠殿基記竝六年建皆云歲在庚子以此知帝紀之失非二碑則晉紀與載記不復可考矣 金石錄

偽趙鄴縣西門豹祠碑

建武六年

漳水東北逕西門豹祠前祠東側隱起為宇祠堂東頭勒銘曰趙建武中所修也魏文帝述征賦曰羨西門之嘉迹忽逕睇其靈宇 水經注

右趙西門豹祠殿基記云趙建武六年歲在庚子秋八月庚寅造西門祠殿基又云巧工司馬臣張由監作更臣杜波馬孫殿中司馬臣王基殿中都尉臣潘倪侍御史騎都尉臣劉瑄左校令臣趙升殿中校尉臣顏零等監其下刻物象甚多如土長強良碩章舒悽雀之類其事頗異近歲臨淄縣人耕地得巧工司馬印遍尋史傳皆無此官名不知爲何代物今乃見千此碑云

金石錄

晉王逸少書樂毅論

永和四年

右晉樂毅論石在故高紳學士家紳死家人初不知

惜好事者往往就閱或摸傳其本其家遂秘藏之漸爲難得後其子弟以其石質錢於富人而富人家失火遂焚其石今無復有本矣益爲可惜也後有甚妙二字吾亡友聖俞書也論與文選所載時時不同考其文理此本爲是惜其不完也

集古錄

右晉樂毅論石本舊藏高紳學士家集古錄云紳死其子弟以石質錢于富人而富人家失火遂焚其石者非也元祐間予侍親官徐州時故郎官趙竦被旨開呂梁洪挈此石隨行已斷裂用木爲匣貯之竦尤珍惜親舊有求墨本者必手摸以遺之竦歿今遂不

知所在 金石錄

樂毅論世無全文高紳所藏石至海宇止以史記校之四纔得其一耳今世所傳又其摹字此者蓋無取也觀梁武帝評書謂此論微粗徒恐非真蹟陶弘景亦疑摹本梁去東晉六十年其書不存況今去梁又數百歲中間馮承素已見六本今世所傳亦莫能辨先天中太平敗後咸陽老姬投書竈下是弘景所評已亡後世存者可求其真耶 廣川書跋

智永師謂樂毅論正書第一自梁世摹出其後蕭銑之流莫不臨學然則此論不傳矣陳文帝嘗書賜始

興王雖號筆力鮮媚殆其臨榻之功勝也祕閣購書則其論全文陶弘景言樂毅論迴極勁利而非用意處故頗有壞字今所得異矣元符中詔摹於石以其書校之殆唐人所書不逮嘗求得全文迺自石未破時摹尤爲精勁余從其家得之非今祕閣石可比方也

舊傳樂毅論誤書兩字以雌黃點正以今所傳按於舊史異者蓋二十八字其文意字不相妨蓋書傳已久不能無誤昔時於奉珍兵部家得別本樂毅論文字完整筆力差劣然校今祕閣石本亦可上下相敵

或疑王著所書也

李庠舊得樂毅論其本迺高紳所藏石過自矜持謂真逸少書沈存中亦謂得前人說逸少諸書多是繅紙惟樂毅論書于石以此爲據余竊疑其不知何從得此說也昔梁武帝摻采逸少書至盡而樂毅論已出當時無石本傳者大抵逸少每爲人書多以前人賦論見於世傳者存之如黃庭畫贊洛神賦皆書於紙以授雖脩禊序亦不令入石也唐得晉魏諸家書字故嘗評黃庭第一畫贊次之樂毅論又其次也武平一曰太宗於右軍書特留賞蘭亭樂毅論尤聞寶

重別一小函貯之太平公主私取樂毅以歸及籍其藏咸陽姬竊舉袖中投之竈下開元錄書但有黃庭畫贊告誓而樂毅論亡矣廣川書跋

世傳二王帖皆以真迹模勒獨樂毅論就書丹其石在高學士紳家已殘缺至海宇後轉屬趙立之處今重摸者後猶有趙立之印予嘉熙庚子自嶺石回至宜春元本於一士家用北紙北墨魚二字殘缺而清勁道媚正類蘭亭字形比今世所見重摸本幾小一倍此蓋齊梁間拓本真人間希世之寶潘

偽趙害銘

太寧元年寶晉末和七年

石虎增高銅雀臺濬數井深十五丈藏冰及石墨石
墨可書人然之難盡亦謂之石炭又有粟窖及監以
備不虞今窖上猶有石銘存焉

水經注

燕盧龍銘

元璽二年實
晉永和九年

燕景昭元璽二年遣將軍步渾治盧龍其道焚山刊
石令通方軌刻石嶺上以記事功其銘尚存

水經注

古今法書苑卷之六十二

